



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Rahul Gandhi-i Tripura nung BJP sorkar aitsür

Transition sülen Sudan sorkar nung shilem magitsü: Burhan



VOL. XIX ONO. 32 (ADOK 32) DIMAPUR SANGTENNÜ (TUESDAY) YIMPOKSÜI (NOVEMBER) 09, 2021

₹ 5.00

Nov 16 nü BAC senden amentsü

Dimapur, November 8, 2021 (TYO): Nagaland Legislative Assembly Speaker aser Business Advisory Committee (BAC) Chairman Sharingain Longkumer-i November 16, 2021 nü BAC senden ka amentsü jateper, ta Commissioner & Secretary, NLA, Dr. P.J. Antony-i metetdaksüogo. Sendenji anepdang 11:00 ako

nung Committee Room, Assembly Secretariat nung amentsü aser 13 buba Nagaland Legislative Assembly indang session 9 tugububa indang Provisional Programme renemtsü, ta paisa ashi.

Iba senden nung BAC züngsem ajak adentsü mepishir, ta Dr. P.J. Antony-isa metetdaksü.

Nagaland sorkari tangalen nungi arurtem atema SOP latetshir

Dimapur, November 8, 2021 (TYO): Nagaland sorkari tangalen nungi tourist arurtem atema SOP meyipa reprangshio go aser ibaji November 11, 2021 nungi mapa küma tenzüksü. Revised SOP ajanga tangalen nungi arurtem aser tourist ajak Dimapur Airport, Dimapur Railway Station, Dimapur- New Field Check Gate, Dillai Gate, Kohima- Khuzama, Mokochung- Tsutapela, Watiyongpang, Mon-Naginimora, Tizit, Wokha- Bhandari aser Phek-Lanye Junction o Akash Bridge Points of Entry nung COVID-19 Screening Test asütsü shia lir.

agütsüogo.

COVID-19 vaccine magirtem mesüra mezüing dose dang agirtem mesüra arishi küm 12 nungi 18 tsüingda alirtemi negative test report abentsüla. Ibaji parnok ainlen jajaba tenzüker anogo 3 tsüingda agiba test report asütsüla, ta Nagaland sorkarisa latetogo. Assam mesüra Manipur ama state-i Nagaland nung manezüki aoertemi parnok indang ticket mesüra pei gari indang kuli aser tanga state nung address kuli tejangia sayutsüla, ta sorkarisa ashi.

Iba revised SOP ya Nagaland state ajungalen memelenshü dang inyaksü aser District Task Force, Urban Local Bodies, Village Authorities mesüra Community-based Organizations ajanga melenshütsü makok ta state sorkarisa metetdaksüogo.

State sorkarisa shirangba yimya malirtem aser COVID-19 indang vaccine dose anaprong agiba arishi küm 18 ser temapurtem Points of Entry nung metendangsü mesüra quarantine masütsü temelaba

COVID-19 Nagaland: Nisung 3 dak putet & 13 taneptsü angu

Kohima, November 8, 2021 (TYO): Nagaland nung Hombarnü nisung 3 dak COVID-19 putet aser 13 taneptsü angu.

"Tanü puteter ajakji Dimapur nung lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüingda COVID-19 puteta alir nisung 13 taneptsü angu. Parnokji Dimapur nung 7, Kohima nung 4 aser Peren o Zunheboto nung kaka (1) lir" ta paisa ashi.

Nisung 31,938 rongnungji parnok 30,021 taneptsü nguogo aser ibaji taneptsü angur 93.99% lir, ta Dr Kikon-isa shisem.

Tang nisung 181 anepaludar

saka parnok 149 dakbo shirangba yimya kecha mali, ta paisa ashi.

"Deobar tashi nung nisung 714,046 nem COVID-19 vaccine indang dose 12,19,191 agütsüogo" ta State Immunization Officer, Dr Ritu Thurr-ia metetdaksü.

"Vaccine agirtemji frontline workers 60,963, healthcare workers 15,998, arishi küm 45 ser temapur 202,903 aser arishi küm 18 nungi 44 tsüingda alir 434,182 lir" ta pai ashi.

Vaccine agirtem rongnung parnok 505,145-i dose agiogo. Parnokji frontline workers 48,070, healthcare workers 13,431, arishi küm 45 ser temapur 163,926 aser arishi küm 18 nungi 44 tsüingda alir 279,718 lir" ta Dr Thurr-isa metetdaksü.

National Museum nung "Destination North East India" temogo

New Delhi, November 8, 2021 (Agencies): New Delhi nung National Museum ajanga North East India nung sobaliba takar indang benjung mongogo.

India nüjiso ngur 'Azadi Ka Amrit Mahotsav' benjungmong nung shilem ka ama "Destination North East India" benjung ayongzüka agi.

Iba benjung ya November 1, 2021 nungi tenzüker aser yashi nikongdang tembangogo.

November 1-3, 2021 mezüing anogo asem nung Assam, Manipur, Mizoram, Nagaland, aser Sikkim state nungi sobaliba shilemtem (Folk Dance and Music) sayua liasü.

Tanga benjungtem ajuruba ajanga November 4 aser 5 anogotem National Museum indang benjungmongji online

ajanga agi.

November 6 nungi North-East India indang sobaliba shilemtem agütsü tenzüker aser ibaji yashi nikongdang tashi agiogo.

Benjung tembangba sentong nung National Museum ketdangsür Subrata Nath-i nisung ajak dang hopta piyong benjung amongba indang social media posts lemsatepa nisung teimba nem metetdaksütsü mepishia liasü.

Sentong nungsa Director General, National Museum Partha Sarthi Sen Sharma aser Additional Director General, National Museum Subrata Nath nati shilem agir nem mentemos agütsü.

Kanga dang aritepa osang agüjaka, artists temi North-East indang sobaliba sayuba atema pelar" ta Sharma-i ashi.

Dr. SC Jamir-i Tir Kovind ket nungi Padma Bhushan agizükogo



Rashtrapati Bhavan, New Delhi nung India Tir Ram Nath Kovind-i Dr S.C. Jamir nem Public Affairs atema Padma Bhushan agütsüba angur. (New Delhi, November 8)

Dimapur, November 8, 2021 (TYO): Hombarnü Rashtrapati Bhavan, New Delhi nung India Tir Ram Nath Kovind-i taoba Nagaland chief minister Dr SC Jamir nem Padma Bhushan agütsüogo.

"Tir Kovind-i Public Affairs atema Dr S.C. Jamir nem Padma Bhushan agütsü. Yimtenren lennir tejen aser state aika nung Governor inyaker Dr Jamir ya Nagaland state kümteter rongnung ka lir" ta Rashtrapati Bhavan-i Twitter nung metetdaksü.

Nagaland nung yimtenren lennir kati Padma Bhushan award mezüing agizüksangji Dr SC Jamir lir.

Dr SC Jamir ya October 17, 1931 nü aso aser 1971 küm mezüing Nagaland Legislative Assembly nung züngsem aküm. Iba sülen pai kümsük pezüben tashi chief minister inyaka liasü. Paisa Goa, Gujarat, Maharashtra aser Odisha nung Governor inyakogo.

Pa Mokochung nung azüing aser iba sülen Kolkata nung aliba Scottish Church College nung intermediate in arts azüing.

Iba sülen pai Allahabad University nung higher studies atema ao aser idakji BA aser LLB degrees angu.

1960 küm Prime Minister Jawaharlal Nehru den olemtepa telok nung Dr SC Jamir dena liasü aser iba ajanga India kübok Nagaland state kümtet.

Nagaland state kümtetba 16th Point Agreement nung sign asürtem rongnung pa ka lir.

Dr SC Jamir ya Nagaland state nungi mezüingbuba Lok Sabha Member lir. Pai 1961 nungi 1970 tashi MP ka ama inyaka liasü.

November 6, 2021 nü Dr SC Jamir-i Prime Minister Narendra Modi den ajurutepe liasü.

"Taoba Nagaland CM aser akhümsüba aliba yimsüsür ka SC Jamir den ajurutepepa atema pelar. Künati onük aika atema tebilembatem lemsatep. 2009 küm pai Gujarat nung mapang tatsüka atema Governor inyakdang pa den külemi inyakseba menungra a bilemteter" ta PM Modi-ia metetdakja liasü.

Hombarnü Tir Ram Nath Kovind-i nisung 73 nem Padma awards agütsü. Nisung 73 rongnung Padma Vibhushan 4, Padma Bhushan 8 aser Padma Shri 61 dena lir.

Padma Bhushan ya India nung civilian award tematiba rongnung tasembuba lir.

Rio, Patton aser Therie nung tenüngsang agütsür:

"Dr. S.C Jamir nem Padma Bhushan agütsüba atema tenüngsang agütsür. Public Affairs wadang nung mapa tajung inyakba atema Civilian Award tasembuba agütsür. Nü tarutsü wadang ajak nung temoatsü meshitsür" ta Nagaland Chief Minister Neiphiu Rio-ia Twitter nung ashi.

"India Tiri Padma Bhushan Award agütsüba atema Dr. SC Jamir nem tenüngsang agütsür. PM Narendra Modi lenisüba kübok India sorkari Dr. Jamir-i inyakba mapa ajitetba atema pelar" ta deputy chief minister Y Patton-ia metetdaksü.

"Taoba Governor aser Chief Minister Dr. S. C. Jamir-i Padma Bhushan agizükba atema tenüngsang agütsür. Pai inyakba mapa ajitetba aser sempet agütsüba ya kanga dalang lir. Tesüba küm 70 tashi pai anibelem artem inyakba aser Nagaland kinüklen ajak sema senzüba asenoki nguogo" ta NPCC President, K Therie-ia tanü sangdong ka nung ashi.

"Pai tarutsü atema lenmang shitak tuyua nisungtem ajungmesogo. Arishi küm 90 tashi pa taküm aliba ya asenok asoshi temoatsü lir aser pai Padma Bhushan agizükbaji asenok ajak indang konang lir" ta pai ashi.

"Dr SC Jamir ya Uttar Pradesh (UP) nung aso asübo linük nung tematiba menden tonger lila. Asenok tia kaa pa Nagaland nung aso. Pa tambur kümer par yimeri pa magizük saka Congress-i pa Governor shim aser linükia pa ajiteta akhümsüba agütsür" ta K Therie-i metetdaksü.

"Pa arishia alidang yimten khuret ya angatetpedaksünür. Pa ya Nagaland nungi chichiba nisung ka lir aser pai pa dang nungi Nagaland temeintiba. Pa atema onoki kanga nüma atanger aser pai inyakba mapatem atema pelar. Ni pa asoshi arishi talang meshitsür" ta NPCC President, K Therie-isa metetdaksü.

Assam CM-i ULFA-I aser Naga yimten tebilemetsü indang jembitsü

Guwahati, November 8, 2021 (Agencies): Assam chief minister Himanta Biswa Sarma-i Hombarnü nungi tenzüka anogo asem atema New Delhi semdang.

Anogo asemnü Delhi nung amongdang CM Sarma-i PM Narendra Modi aser Home Minister Amit Shah na den ajuruteptsü.

Paisa Defence Minister Rajnath Singh aser National Security Advisor (NSA) Ajit Doval na den-a ajuruteptsü ta osang ajanga ashi.

Assam chief minister-i PM Modi, HM Shah, defence minister Rajnath Singh aser NSA Doval nung den ajurutepdang Northeast dak sendakba onüktem jembitsü.

CM Sarma-i tongti süa jembitsüba onükji Paresh Baruah-i aniba ULFA-Independent den olemtep tenzüksüba indang asütsü.

Independence Day benjung nung Assam chief minister Sarma-i ULFA-I tanishir Paresh Baruah dang olemtep nung adentsü atema mepishia liasü.

Külen, CM Sarma ya Northeast Democratic Alliance (NEDA) indang convenor lir aser iba jagi pai Naga yimjung olemtep indang onük benoka jembitsü akok.

NSCN-IM-i central interlocutor AK Mishra den olemtep nung tamakok nguogo aser Naga nungeri wako aser temzüng balaka meshiba

magizüker ta sangoktsüba ajanga Naga yimjung maparen nung tetsükdaksü ajurua lir ama ajiteter.

Olemtep nung Naga wako aser Temzüng ya kanga tongtipang saka India sorkari tekong meranga noktaker ta NSCN-IM-isa metetdaksüogo.

NSCN-IM-i akhangba tongtipang anaji Nagaland atema wako aser temzüng balaka lir saka iba ya Centre-i magizüker.

Naga nunger wakoji sü ka dang masü Naga linük konang aser tangatetba indang maitsü lir ta NSCN-IM-i ashir.

Centre-i wakoji sobaliba noksa ka ama agizüksü akok ta ashibaji magizüker ta parnokisa ashi.

Mokokchung District Planning & Development Board senden menogo



Minister, PWD (Housing & Mechanical) aser Chairman, DPDB Mokokchung, Tongpang Ozukum-i anir ADC Conference Hall, Mokokchung nung November 8, 2021 nü District Planning & Development Board (DPDB) Mokokchung senden amenba mapang tangokba noksa ka yangi angur.

Dimapur, Yimpoksüi/Nov. 08 (TYO): October aser November 2021 asoshi District Planning and Development Board (DPDB) Mokokchung pur senden November 8, 2021 nü ADC Planning Conference Hall, Mokokchung nung mena liasü.

Iba senden ya Minister, PWD (Housing and Mechanical) aser DPDB Mokokchung mendenpuba, Tongpang Ozukum lenisüba kübok mena liasü.

Gandhi Jayanti 2021 nüngtem nung Raj Bhavan ajanga ayongzükba Essay tetoktepa nung takok angur nem senpet aser kulizüng kaket agüja iba senden tenzuka liasü. Iba tetoktepa nung Jubilee Memorial School Mokokchung nungi Alemmeren B. Longkumer-i mezüngbuba aser Senmangba Jamir-i tanabuba jenjang nguteta liasü.

Iba sülen taoba senden nung jembiba tanaben lepa repringhia liasü.

Youth Hostel Mokokchung dak sendakba nung DPDB Chairman-i iba indang Minister ajurua iba project indang tezüluba ka agütsüogo, ta ashi

aser department ajanga iba project mapa maneni inyaktüsü atema ata alitsü shia liasü.

Kendriya Vidyalaya School, Tuli dak sendakba nung school indang ali kiburtemi school amenoktsü atema ali angati agütsütsü molunga lir, ta DPDB Chairman ajanga ashi. Anungji iba school ya meshibangtsüla, ta pai ashi.

Mokokchung jila nung aliba main junction nung tetsüng agi senzürtem atema Footbridge ka yanglutsüba maparen dak sendakba nung pai Department of Urban Development nungi ketdangpurtem den ajurutepa iba project indang kanga junga jembioigo aser department nungi telangzüba ata lir, ta DPDB Chairman aser Minister Tongpang Ozukum-i ashi.

Mokokchung Municipal Council (MMC) Dumping Site dak sendakba nung ADC aser MMC Affairs, Mokokchung ajanga ashiba agi, tang MMC Dumping Site aliba nung putu menden aser ali kiburi ali ua MMC dang ayoktsü memolunger (Outright Purchase atema) aser iba atema senden nung lenmang bushitsü jembia liasü.

Mokokchung Highway By-pass lenmang dak sendakba nung PWD Department ajanga senden nung DPR agütsü aser department-i ali kiburtemi lenmang yangludaktsütsü asoshi molunga lir aser iba maparen takok ngua inyaktüsü atema akokba lenmang ajak nung yariteptsü shiogo, ta ashi.

District nung COVID-19 tashidak wara den raratsü atema medical osettem nüngdaka aliba indang onük jembiba mapang Chief Medical Officer Mokokchung ajanga district nung nüngdakba oset tenüngtem benok aser Board ajanga agizüka liasü. Board ajanga item osettsüset alitsü atema temelaba agüja liasü.

Teshimtet committee kati Village Councils Act Nagaland indang Document meyipzükba senden nung agizüka liasü.

Iba senden nungsa Soul Care, Chami Village ya society registration atema agizüka liasü.

Züngsem tasen, B. Imti Tzudir, District Agricultural Officer (DAO) Mokokchung lokti den metetpelaba agia liasü.

Mokokchung Police puri Police Commemoration Day mungogo

Dimapur, Yimpoksüi/Nov. 08 (TYO): Mokokchung Police puri Police Commemoration Day aser Rashtriya Ekta Diwas (National Unity Day) nüngtem nung sentong ka DEF Mokokchung nung October 21 nungi 31, 2021 anogotem nung ayongzükba liasü.

Police Commemoration Day 2021 ya New Reserve, Quarter Guard, Mokokchung nung October 21, 2021 nü munga liasü, kong 'sister agencies', NGOs aser civil society tem nungi teshimtet nisungtem arua dena liasü.

Iba anogomung nung police tanishir temi linük asoshi takum tenlaba sepaitem indang yimtsüngtem semdanga Village Council Chairman aser Police Station tem nem linük asoshi asürtem noksa agüja liasü.

Ajidang masü parnoki leaflets amala nunga police temi linük asoshi inyakba zülur lema liasü. Tang teyangludak DEF School Building tasenba nem Asür Ved Prakash, IPS nüngja jaloktsütsü lemte. Asür Ved Prakash, IPS ya Superintendent of Police, Mokokchung inyaka lia August 26, 1994 nung tepseta liasü.

Iba sentong nung shilem ka ama Police School, DEF Mokokchung nung azünger kaketshirtem painting competition agi aser ano DEF Mokokchung aser NAP BN tsüngta volleyball asaya liasü.

"Role of Police in Nation Building" omen nung ajemdaker Unity Run ya Mokokchung Town nung October 30, 2021 nü ayongzükba liasü, kong Home Guards & Civil Defence, NPTO, NCC (Fazl Ali College), AKM aser Run Mokokchung nungi züngsemtem 100 shi arua shilem agia liasü.



Nagaland Education Project (NEP) ajanga Town Hall, Peren nung November 8, 2021 anogo ka community awareness sentong ka ayongzükba liasü. NEP indang Project Director aser Principal Director, School Education, Shanavas C, IAS ajanga ashiba agi, Peren nung Mid-Day Meal project kanga junga inyaktetogo. Nüburtem lungjemer inyakra Nagaland nung temelenshi alitsü, ta Principal Director-i ashi.



Office of the
AO SENDEN LITERATURE BOARD (ASLB)
MOKOKCHUNG - 798 601, NAGALAND

Ref. No. ASLB/Gen-16/2020-2021

Anogo: 08-11-2021

ASLB SANGDONG:

Ao Sendeni (AS/Gen-6/204/782, Dated 8th Nov. 2021) nongloktsüba nung ajemdaker Yimpoksüi (Nov) 13, 2021 anogo class 9-12 tsungda nung Ao Tesayurtem ajak den Ao Senden Tongror Luden aser Ao Senden Literature Board (ASLB) külemi Ao o oshiooben tsütsü Shisalemsa Mensem ka Ao Senden Conference Hall nung 11 ako nungi alitsü, yangji temalen shia alir tesayurtem ajak adentsüla. Anungji school ajak nungi iba sentong nung medema arua adentsü metetdaksür. Iba osang sangdongba dak alaka school-tem dangi shiti balaka meyoaktsü.

Sd/-
Dr. L. Temjen Jamir
Chairman, ASLB

Sd/-
I. Temjen Tzudir
Secretary, ASLB

Bank of Baroda Mkg Branch ajanga metetdaksür

Dimapur, Yimpoksüi/Nov. 08 (TYO): Bank of Baroda Mokokchung Branch nungi Life pension/family pension agirtem Physical Verification atema Life certificate November 30, 2021 tashi nung Bank tongtsütsü metetdaksür, ta iba bank

sangdong ka ajanga ashi.

Life certificate den "D card", "Pan Card" aser "Aadhaar Card" Xerox copy densem agütsütsü nenshia metetdaksür, ta D. Firose Athu, Branch Manager, Bank of Baroda, Mokokchung Branch ajanga ashi.

ADC & ERO Mokokchung ajanga metetdaksür

Dimapur, Yimpoksüi/Nov. 08 (TYO): Addl. Deputy Commissioner & Election Registration Officer, Mokokchung, Shashank Pratap Singh, IAS ajanga sangdong ka nung 21 Tuli, 22 Arkakong, 23 Impur, 24 Angetyongpang, 25 Mongoya, 26 Aonglenden, 27 Mokokchung Town, 28 Koridang, 29 Jangpetkong aser 30 Alongtaki constituency tem nung aliba nüburtem dang Registration of Electors Rules, 1960 nung shia aliba ama Electoral Roll renemogo aser repringdangtsü atema ADC & ERO, Mokokchung aser teshimtet tesem/Polling station

nung office mapang angutsü, ta metetdaksüogo.

Iba Roll nung tenüng inoksemtsü mesüra inoka aliba nung temelenshitsu mesüra ashishiteptsü lira, Form 6, 6A, 7, 8 mesüra 8A nung 30-11-2021 tashinung agütsütsüla, ta ashi.

Item temelenshitsuji office of the ADC & ERO, Mokokchung mesüra pei Booth Level Officer/AERO nem agütsütsüla mesüra ADC & ERO, Mokokchung dangi post ajanga yoktsü akok. Electoral Roll renemtsü atema qualifying date ji 01-01-2022 alitsü, ta kasa sangdong ajangasa ashi.

Tuensang DPDB senden nung COVID-19 vaccination drive indang jembia

Dimapur, Yimpoksüi/Nov. 08 (TYO): Tuensang District Planning and Development Board pur November 2021 atema senden Deputy Commissioner, Tuensang indang Conference Hall nung November 8, 2021 nü Deputy Commissioner & Vice Chairman DPDB, Tuensang, Kumar Ramnikant lenisüba kübok mena liasü.

Iba senden nung Tuensang Sadar nungi ADC Shamator dangi Sotokur EAC HQ transfer asüba indang onük benoka jembia liasü.

YTC tiri ashiba agi, administrative maparen temelaba nung inyaktetsü mechi iba onük ya benok, aser yangji CKS nungi teshimtet lenirtemi iba maparen atema züngzüktepa indang lemsatapa liasü.

Iba maparen sorkar nungi temelaba agitsü atema temaba mendeni yoktsü atema senden nung molungtepa agizüka liasü.

EAC Longkhim quarter yanglushitsü atema senotsü lemzütsütsü atema senden nung

benoka jembia aser approval asoshi yoka liasü.

COVID-19 mozü agiba maparen nung Tuensang district ya linük nung tsünglang 41 buba nung lir, aser iba indang senden nung jembia aser iba maparen tali tajungba nung inyaktüsü asoshi jembia liasü.

District indang HoDs temi anir yimyak-yimtsüngtem nung COVID-19 vaccination indang awareness agütsütsü asoshi senden nung telemtepa agia liasü.

District nung COVID-19 mozü agiba maparen tali tashi itshitsü mechi Tuensang town nung 24x7 vaccination center ka amenoktsü lir, ta senden nung metetdaksü.

Züngsemtemi Departmental sports week alitsü lemte aser iba atema SDO(C) Sadar, Shelly Katiry ya convener shim aser iba asayamung tejangja aser anogo ya DPDB group forum nung metetdaksütsü lemte liasü.

Senden nung PHE department ajanga department inyakyim indang PowerPoint agüja liasü.

Metongshitsür

Dimapur, Yimpoksüi/Nov. 08 (TYO): 'Mangetong Cultural Club Kohima pur Silver Jubilee mungogo' ta sür osang ka Naga News nung November 4, 2021 nü adokba nung Tongpang L. Imchen masü Wati L. Imchen

aser Nokchansashi Kichu masü Nokchasashi ta azüngtsü mepishir, ta sangdong ka ajanga ashi.

Tenüng aibelena adoktsüba atema kanga sasar, ta sangdong ajangasa ashi.

Lumding Reserve forest nung alitsü atsünga agirtem meindoktsü atema police & CRPF 1000 mapa lemozüksü



Hojai district kübok Lumding tesem nung ali atsünga arua ki yanglua alirtem shidi amshia raksatsüba noksa nung angur.

Hojai, November 8, 2021 (Agencies): Hojai district kübok Lumding tesem nung ali atsünga agirtem meindoktsü atema Assam sorkari police aser CRPF sepai 1000 mapa lemozüksü.

Guwahati High Court-i tuyuba ama parnoki Lumding Reserve forest nung ali atsünga agirtem meindoktsü.

September 30, 2021 nü

Guwahati High Court-i Assam sorkar dang reserve forest indang ali atsünga agirtem shilem lemsar meindoktsü atema tetuyuba agüja liasü.

Anogo ana tsünga sorkari forest land nung ali hectare 500 shi meyipa agitsü ta osang angazüker. Iba mapa nung shidi aser JCBs amshir.

"Iba tesem nung tensa akhi ama dang lir aser district

administration-i ashiba ama kibong 99% tashi toktsür ogo" ta Hojai Deputy Commissioner, Anupam Choudhary-i ashi.

Police aser CRPF personnel 1,000 shi mapa lemozüksübaji 'standard procedure' lir ta Hojai Superintendent of Police, Barun Pukayastha-ia ashi. Iba tesem nung alirtemi High Court-i tuyuba angatetogo aser mapa timi dang inyaka odar, ta paisa ashi.

Assam Sorkari passenger tem atema tetuyuba tasen latettsür



Guwahati, November 08, 2021 (Agencies): Hombarnü Assam sorkari sangdong ka ajanga tanga tesem nungi State-i arur passenger ajak, shirnok Covid-19 vaccine anaprongla agir lir, parnok airport aser railway station tonga aruba sülen Covid-19 metendangtsü ta metetdaksü.

"Tanga tesem nungi arur passenger tem, shirnoki screening tekolakpur dang Covid-19 vaccine dose anaprongla agiba aser vaccine agiba certificate sayudir, Airport, Railway station, Road Border Point nung Covid-19 test magitsü" ta parnoki ashi.

Assam nung Covid-19 tensa süngjema küma aoba asadangteta Health & Family Welfare department ajanga iba telemtetba agir.

"Covid-19 wara prokba nokdangtsü atema, airports, railway stations aser lenmang ajanga arurtem (passenger) maneni screening agiba den tekümdangtsü mera takang nung anidaksü," ta tetuyuba nung shia lir.

"Tawa tanü ka State aser linük nung COVID-19 tashidak puteba ajema odar" ta sangdong nung shia lir.

Ghonda 24 tsünga Covid-19 tendangba report agütsütsü aser kasaji verification atema ICMR portal nung upload asütsü atema linük tesem ajunga nung testing facility tem lapoka lir.

Linük nung Covid-19 vaccine dose anaprongla agir alirtem timba kümogo.

"Anungji, department ajanga 01/09/2021 anogo

sangdong ajanga matetdaksüba nung bendenloksema, tayimtsü, railway aser lenmang ajanga Assam nung senzusenbonger ajak kümzüka yutsütsü asoshi item mera agir," ta health & family welfare department-i metetdaksü.

Iba tetuyuba ajanga angazükba agi, passenger shirnok Covid-19 vaccine dose ka agir lir mesüra vaccine magirtem aser dose anaprongla agir alirtem dak iba tashidak temaitsü lidir, parnok ajak temzüng agi melaba ama Assam airports, railway station tonga aruba mapang pei senbong nungi RT-PCR test agitsüla. RT-PCR test shia atema sen 250 dang agütsü," ta department-i ashi.

"Arishi küm 10 tekübok tanurtem, shirnok tsürabur/kinunger (dose anaprongla agir alirtem) deb Assam-i arudir, parnok Covid-19 test agitsü tetuyuba nung manidaksü. Ajisüaka, tsürabur/kinunger temi mulungra, tanurtem atema voluntary paid testing achaayangtsü" ta kasa sangdong nung shia lir.



Mizoram kübok Champhai district nung Assam Rifles sepaitem aser Customs Department, Champhai ketdangtsürtemi Rs 91,45,500 alang kozüjang apu. Hombarnü Zotlang nung parnoki bosta 35 nung kozüjang bona lia apu. (Aizawl, November 8)

Manipur nungi Congress MLA ana BJP nung denogo

Guwahati, November 08, 2021 (Agencies): Hombarnü New Delhi nung Manipur nungi Congress MLA ana Bharatiya Janata Party (BJP) nung denogo.

Union Minister Sarbananda Sonowal aser Manipur atema party's in-charge, Sambit Patra na matsüngdang Congress MLA tem- Rajkumar Imo Singh aser Yamthong Haokip nati BJP nung denogo.

Singh ya Congress ticket nung shima liasü, saka party anema inyaker ama temulung melemi bilemba ajanga pa party nungi agienadok.

Osangbener den jembiba mapang, Singh-i, linük nung yimji-yimjung, tesünap aser tashiidaktsütsü atema Ato Kilonser, Narendra Modi-i mapa aika inyakogo, ta ashi.

2017 küm Manipur nung tzüzüng-ozüng mamshiba/manidakba, mapang shia nüburtem longkak aita lenmang nokdangba aser tenem o lenden nung alir nüburtem tsünga tebandang aliba alimai

jangjaa lir, saka tangbo item timtem mali, ta pai ashi.

Imo Singh tebu, Rajkumar Jaichandra Singh ya Manipur indang taoba chief minister aser State nungi mezüng Union minister ka liasü.

Sonowal-i, Imo Singh aser Yamthong Haokip naprongla iba telok (BJP) nung pelashishia agizük aser Modi Sorkar akhüm kübok Northeast tesemtem tali jangjatetogo, koba item tesem (Northeast India) nung timtem balala repringshimtsü aser bentettsü atema Union minister aser bureaucrat temi mapang shia Northeast semdangtsü, ta pai ashi.

Patra-i, Manipur State nungi tongtibang nübu ana telok nung adenba asoshi BJP nümatanger, ta ashi aser assembly polls nung iba telok yagi shilem asem nungi menden anabo (two-third seats) takok angutsü imlar, ta Patra-i lemsatap.

2017 küm Manipur State nung mezüng BJP yimsüsüba arua liasü.

Rahul Gandhi-i Tripura nung BJP sorkar aitsür



Congress lennir Rahul Gandhi

Guwahati, November 8, 2021 (Agencies): BJP-i aniba Tripura sorkari Unlawful Activities (Prevention) Act (UAPA) kübok journalists aser lawyers anema ken o benokba aitsür ta Congress lennir Rahul Gandhi-i metetdaksü.

Tripura nung nübortem anema UAPA kübok ken o benokba ajanga parnok ola menembangtetsü ta pai ashi.

BJP-i teti osangbener agientsü meranger ta Rahul-i ashi.

Tripura nung raratepba aser mosque amakba dak sendakba nung journalists aser activists dena nisungtem indang social

media handles anema UAPA ken o tem benok aser iba atema Congress lennir Rahul-i aitsü.

"Tripura aronger' anungji inyakyim melenshitsuila, saka BJP-i osangbener tepseter kuli nembangba mapa kanga sapua inyaker. Ajisüaka UAPA ajanga ochi menembangtetsü, ta Rahul-isa metetdaksü.

Honibarnü Tripura Police-i UAPA kübok social media account holders 102 anema ken o tem benoka liasü.

Police-isa Twitter, Facebook aser YouTube dang item accounts shibangtsütsü aser tamshirtem tenüng agütsütsü osang sangoktsü.

Manipur nung IEDs seret 300 jungnüa angu

Imphal, November 8, 2021 (Agencies): Manipur nung sepaitem India-Myanmar artsü anasa aliba Moreh jila nung tapoktsü seret 300 jungnüa apu.

Assam Rifles sepaitem seret 283 touzük Improvised explosive devices (IEDs) apu.

Hombarnep züngia Betuk yim anasa AR indang patrolling party kati IEDs ji angu.

Deobar aonung Assam Rifles indang patrolling party-i motorcycle nung lanur ana mener aruba sot. Tena ya Myanmar tsütsü nungi India telungi miima aittsüba liasü.

Idangji lanur ana jagi arem nung box asem shi toktsür jena ao. AR patrolling party-i anepdang box lapoka repringdang IEDs enoka liasü.



TIR YIMYIM YIMOBILEM (EDITORIAL)

DIMAPUR SANGTENNÜ, YIMPOKSÜ (NOVEMBER) 09, 2021

Soja sotetba walunir

India kum 75 otsu nung Naga nung yimten yimsusurtem rongnung mezung India ato kilonser Pandit Jawaharlal Nehru den kilonser mapa inyaksang aser Nagaland state akumertem rongnung tang tashi arishia takum alisang, kum 90 tain wabong S.Chubatoshi Jamir nem linuk nung tiri Padma Bushan konang agutsubaji Naga nung asoshi tepelatsu osang tajung ka lir. Arishi kum 90 nung 60 bo yimten mapa nung nubortem tenzuka wadang balala nung tasua majem, tensa tajung majung ajak ajangshia inyaka aruba lenirji Naga lima nung soja sotetba walunir ka asutsu. Pa yabo Naga nung asoshi dang masu saka India asoshi yimten nung shisalen sayur ka asutsu sotetba walunir ka lir. Pa center government nung kilonser mapa inyaka tenzuka nungi Nagaland nung Chief minister pezuben tashi inyaker kulanang ano India nung state tulu aser tongtibang Gujarat, Maharashtra, Odisha aser Goa nung angh inyakba maongka aser takokji atamata mapa masu. Nisung aikati pei arishi nung iba ama maongka mengutettsu. Talisa, Naga nung rongnung pa ama adoktsubo kanga tasak asutsu. Atangji, 1958 kum Ungma nung Naga People's Convention (NPC) lokti senden aliba mapang, NPC nung repsem zulur shimba jenjang nungi tenzuka tang India tir ket nungi Padma Bushan konang agizukba anogo tashi nung, walunir S.C.Jamiri ajuruba tensa aser inyakba mapatemji pa kija otsu masu, Naga nung yimten otsu lir. Par mapang parnoki India nung British yimten yimli kubok lia nuhicho anguba tensa tia nguogo. Iba kasa mapang Naga nungertema Naga National Council leniba nung Naga yimten nuhicho jenjang latettsu asoshi inyakdang, Naga nungertem India sepaitem ket nung maksu aser timtem ajurua reshikangshiba mapangtema ajangshiogo. Item reshikangshi timtem nungi pei nubortem kumzüksu asoshi parnoki pei takum bendanga aguja Nagaland state ya mesemtet. Atangji, Naga nung ajak asoshi tia majung, parnoki anir akumba Nagaland state nung Naga kin aser alushi ajakbo maittet aser Naga yimten tebilemetsua tatembang kuma telatetba kati marutet, iba jagi asenok ajak tanu tashi kangshir. Ajisuka, par-a par mapang nung nubortem asoshi tajungtiba asutsu ta bilema parnok takum agi tendanga Nagaland state kumogo. Iba jagi, jungli mejungli, Nagaland kumer joko kum 60 melentepa yimsusua arur. Walunir Wb.Dr. S.C.Jamir ya asoajen topur ajung aser meraket aser jembishinu nung tsungro asong dang masu saka pa dak sempet tajung aika keta lir. Item rongnung sempet tajungtibaji tasutait aser yimten tangatetba nung matsungshii nokdakba sempet asutsu. Joko, aginuyonga maginuyonga, India kubok Nagaland state kumadokerji Nagaland nung yimsusur ajakji India nung kumadoker. Ibayongji, kaketshirtema ni India nung ta ser scholarship agir, mapa inyaker tema ni India nung ta ser inyaker aser yimten yimsusurtema ni India nung ta ser election nung tokteper. Ajisuka, aikati nungdak nung India nung akumer dang ashi, India nung ta asutsubaji mesademi bilemer. Wb.S.C.Jamirbo yamaji masu, pai pa India nung ta numadangdanga shiteter aser Nagaland state-ji pa kija indang amato meima jembir. Iba ama yimten angatetba nung akangakanga nokdakba agi, ato kilonser Narendra Modii pa dak saklok asutsu. 2014 kum center nung BJP teloki yimsu asu tenzuka dang, Congress teloki aniba UPA government mapang shimba angh ajak anendaktsu saka BJP government-i S.C.Jamirbo wazuka ayu aser angh mapajia talilaang bendaktsu. Iba tashiji Narendra Modii dena pa dak temulung lemteta aliba tang tashi mapa agi sayur. Atangji, yimten nung asunungji tembar-a lir aser tsukchir-a lir, anungji kenu ama dangbo masu saka kenunu tepela aser kenunubo takuma dena aotsusa lendong ajurur. Ajisuka, S.C.Jamir takumbo lendong mapang nunga Tsungrem teka agi awabanga yur kumzuka takum kuli aika lir. Atangji, paia tangar jashitsusa yimten nung mapa karbo inyaker alitsua akok, saka Tsungremi kumzukbaji odangbo masu, Naga nung asoshi ano pa ama lenir ka ajanga tajung inyaksu taochi mapang agutsur asutsu. Iba tangatetba nung, Tsungremi agutsuba takum aser shisatsu agi, tamajung ajak amadoker, Tsungrem tenung sanga tang India den Naga yimten tebilemetsu ken o jembir Naga nung lenirtem dena shisalemsatempa Naga yimten ken o tembangtetsu ajaki sarasadema atadi.

OLEMSABANG

YIMSUSUR (RULER)

~ Talitemjen Imchen

Tetir P. Renthly Jamir-i zuluba Tir Yimyim olemsapang onuk yimsusur adok 29th October 2021 nung yarisemer. Yimsusur teratet ji kodang English o (word) nungji reprangdangtir ruler ta ajatsü tapet lir. Iba jagi khristian yimsu taa ajar. Koba teratet Christian rule. Yamaji yimsusur dang ruler ta ajatsü. Yimsusur teratet ji, yim ka nung mesura telok ka nung teshimtetpur-i netsung rongnung korangkoso aliba tiptema aser susumetema bener aor, item dangji yimsusur ta ajar. Anasatiba agi shiba/shir telok ket nung decision-making litir item telok dangji yimsusur ta ajatsü akok.

Yimsusur tashitem aser inyakyimtem (ruler powers & functions) liro memetemtsu akok. Kechiaser telok shia temzung aser jaklapangla palala. Ano telokji kar tazunglen kar tom len aser kar azuklen tentet palala alir. Yamaji kar tulu aser kar tila ta asutsu akok.

Yimden teratet: - Yim ka nung shiba/shirnok tenung teta shimteter yimsu sudaktsutir, item telok denji yimer ajak dena lir ta jatetba olong Yimden ya lir.

Putu menden yimsusuba: - Yim shia putu menden inyakyimtem ji tera palala asutsu akok saka ku bushizungdang nungbo jaklapangla (characteristic) ji kanga mesuktepa lir. Putu menden tenung jateter tatakzuk pututsung kum semer tashi yimsusua arudang, putu kaji zunga koi agi kumer litir, iba tatakzuk kumzuk nungji parnok dang yimsusutsu atar. Putu menden yimsusur ji inyakuaka meinyakuaka, parnokji mapang tatong putu menden yimsusur mapaji atar. Iba jagi putu menden dang tatar menden mesura tatar salang taa ajar. Tanubo Member of Legislative Assembly (MLA) dang Naga nung ajaki TATAR ta raloka jatetba o jia kanga junger. Jila palala nung pei pei yim sasep, tsukong sasep aser kin sasep telongjem tentet yanglur temzung lateta yur yimsu asur.

Aikati sorkar yimsusur o putu yimsusur ana ya kenyongi palala ama bilemer. Putu menden yimsusuba ji, kum semer aser yim sasep nung yimsu asur aser iba menden ya Aor-i yanglutetba menden. Sorkar yimsusuba menden ya America nung-i yanglutetba democracy menden aser iba menden ya yim sasep nung masu saka constituency sasep nung yanglur aser kum pongu atema netsung timba-i melongba nung shimer yimsu asur.

Council: - Council chairman aser pa den sendakbatem ji, Aor tanishir tajungisa, sorkar yimli (government administration) kupok council members ya apolokba (adaptation) ka lir. Council inyakyim jia tangar-i apitetba masu, asenoki yanglusemba ka lir. Iba jagi sorkar aser putu menden yongtsu nung tsulatsutongteter. Yim aika nung putu menden yimsusurtem ji council members lir.

Khristian yimsu: - Arogo nung sanuker-i anir tilatiba tashi pei pei tata menden nungji khristian yimsusur ka ka lir ta metettsu.

YA SHITAK TA TEBU AKUMER

- I. ZULU PONGEN, MONGSENBAI WARD

Ao Milen adok 25th nungi 28th October tashi maneni adoktsuba ocet ka "Ter shilem ya kong agutsutsu" ta zulubaji kanga shitak ta pukuma zulusemetsur.

Oshilu ama lai tetezu Lemtila Peter zuluba onuktemji lephsia mezulur, saka item ajakji shitak ta kuli agutsur. Yangi kija telok aser Arogo teinyaktsu tulu lir, Arogoi mapangshia mission day nung mission indang jembidang ya ter shilem den memeyokteptsu tesayuba agutsutsula. Ano tanga ,mapang nunga ter shilem tesayuba ya jangja-jangja agutsutsu nungdaker, ya aikati tenla ka ama dang angateter.

Shisema aliba ama lokti aser kija kibong mission aser arogo balala mission lir, yangi tera mangateti aibelena aoba aika lir.

Arogo tila kari mission wadang pei temeja ayuba ya tetibo tashi ita malir, anungji partnership nung ao tajungba. Tsungremi ne Arogo kijai Tanela kwi anir aru ta masungdangtsu, saka longjemer (partnership) nung inyaka ora san ketdangsuba nung tamakok malui mission mapaji takok ngua aotsu ya kanga tongtibang lir.

Arogo tila/kija kibong missionji tashi miti ora missionbar kibongji kosa ala-ashia tim atemtsu. Ter shilem yabo Lai nung zulu aliba ama terizungdaki bener arung ta shia angutsu. Arogo tulu sura budget tulu yanglur, tila sura budget tila yanglur, pei tashih yari.

Mongzui pei techanu asoshi an chanu/ozu tila chanu bushia senzua ama, arogo tilai town nung alirtem committee balala nung shimoker sen lenmang bushidang memeteti ter shilem nung aibelener. Ano kibong mission nunga pei kinungertembo kangtepa ter shilem bendener, ya Laishiba tesayuba anema lir.

Iba yagi Town Arogo tebilemba target metongtetsusa akumer. Anungji Arogo tilatemi sentong tulu meyanglutsula, saka pei arogo tashih yari yanglutsula masu no??

Iba ochi mashi maparen ama bilemba metongshija lemsateper.

YIMSU YIM YANGLUR MALI

~ C. Lima Ozukum, Mongsenyimti

Yimti saka pungmang ka dang
Longsoteper parnok talongka
Arakzur shitsu shingu mesuk
Teyangluri shitak yangluaka
Akumliir yongru nung merusem
Mah ta aochia aiter
Zureper tiaji ngua
Tenuk merangloktet
Parnok zungshir mali
Airongma par yipden
Alar tia yabo jenjang temaba.

Shiruru mulungjang aten
Alima metongjungi tepset
Asuktema tepok nung asu
Oja oba ya apitet no?
Tum lima sentokba rokokem
Yimsu yim yanglur mali
Ali pela majangshi dang
Zubo agi asung
Ayako ola dang
Tsuraburi maginu.
Tatempang anogo nung Oh ni shiba.

Iba Olemsabang nung lemsaba ken-o aser shisatsu ya iba ocet zuluri
bilemba ken-o ama tazungeri angateta agitsü mepishir

Kohima Liangmai Arogo nung World Sunday School Day among



Kohima, November 08 (TYO): November 07, 2021 nü Kohima nung Kohima Liangmai Baptist Church D Block-i World Sunday School Day sentong ayongzüka agiogo.

Iba sentong nung Pastor, Rev. N.Silubo Zeliang-i "Sunday school ya kechiba tanurtem atema tongtibang" ta asüba onük nung jembia liasü.

Pastor-i tanurtem dang, kati

ka meimtsü aser adianutem ama ochi nung alitsü atema sayutsü asoshi Sunday school ya tongtibang, ta ashi.

Paisa, Khristan shisaliok, ta ajaba Sunday school ya Tsüngrem meteta aintsü atema angazükba tesem ka lir, ta ashiba den külemi pai tsüraburtem danga pei chirnurtem atema khuret abenba tanur kaka asütsüla, kechiyong tanurtemji Tsüngrem

nungi senmang lir, ta ashi.

World Sunday School anogomong nung Kohima Liangmai Baptist Church Sunday School Department nungi tanur aseme Khristaji pei taküm nung Kümtedakba Kibut ta agizüka tzüsenogo. Rev, N.Silubo Zeliang-i ketdangsüa parnok Baptistsü aser KLBC Women Department-i tanurtem nem sempet balala agüja liasü.

Reshikangshi tia nung alir Khristantem atema sarasademtsüogo

Yimpoksüi/November 07, 2021: November 07, 2021 nü International Day of Prayer (IDOP) anogomong nung alima nung Khristantem reshikangshi tia nung aliba Khristan million 340 atema sarasademtsüogo.

Iba anogomong sentong nung Release International, Christian Solidarity Worldwide aser The Evangelical Alliance densema telok aikati shilem agi.

IDOP 2021 anogomong nung reshikangshi tia nung aliba Khristantem atema sarasademjang, ta International Christian Concern (ICC)-i ayongzüka liasü.

"IDOP ya asen yimsü amangertem bilemteta sarasademtsütsü atema mapang ka lir," ta Religious Freedom of the World Evangelical Alliance ambassador, Godfrey Yogarajah-i metetdakja liasü.

WEA Religious Liberty Commission-i 1996 küm mezüng IDOP ya tenzüka alima tesem balala nung Arogotem dang November ita nung Amongnü ka shimteta reshikangshi tia nung aliba Khristantem atema sarasademtsü ayongzüka liasü.

WEA Secretary General, Thomas Schirmacher-i,

"Joko tesüiba küm 20 dak tema küm shia November ita nung alima nung Arogotemi longjemer reshikangshi tia nung aliba asen adianu Khristantem atema sarasademja arudar. Tanü alima nung Khristan million 300 dak temabo Yisu Khrista dak amangba atema reshikangshiba tesemtem nung alir. Tang alima nung Khristan 8 shia nungi Khristan kabo reshikangshi tia nung lir," ta metetdaksü.

Osangbener den jembidang Open Doors USA Tir aser CEO, David Curry-i, tang alima nung Khristan million 340 dak tema reshikangshi tia nung lir, ta metetdaksü.

Coronavirus lockdown mapang nunga India, Myanmar, Nepal, Vietnam, Bangladesh, Pakistan, Central Asia, Malaysia, North Africa, Yemen aser Khristantem nembo teyari magütsü liasü, ta World Watch List report nung shia lir.

"Khrista sülen anidaksü atema nütsüng timba aliba yimsü toktsürtembo pei apuani, kibong, kin aser yimertemi sendoker, iba denji külemi ketdangsertemia sendoker," ta paisa metetdaksü.

Aid to the Church in

Need, Public Affairs & Religious Freedom Director, Mark Riedemann-i, tang alima nung religious freedom mejungi kongshiba kulitem rongnung tashi tali amshiba sorkartem, Islamic kiralongra aser yimsü alia amangba lir, ta ashi.

Asia nung linük aika Marxist ama party kati yimsüsür, aser item linük rongnung North Korea aser China linük na densema lir, ta Riedemann-i ashi.

Sub-Saharan Africa ya kiralongrartem jenokba tesem ka kümogo, aser Africa kübok linük 14 nung kiralongrar telok 20 dak tema amalitepa inyaker, ta paisa ashi.

"Asia nunga Hindu aser Buddhist yimsü amanger nütsüng timba aliba linüktem nung nütsüng ajema aliba yimsü amangertem anema inyaker. Tatishitsü kaji India lir; nütsüng billion 1.4 aliba linük (India) ya alima nung democracy tulutiba linük lir aser iba linük nung minorities anema inyaker," ta World Watch List report ajanga metetdaksü.

Ajisüaka alima nung Khristantem reshikangshiyonga asen adianutemi taküm tzü- Yisu shimmer, aser iba ya asen tenük agi anguba sayatonya lir," ta parnokisa metetdaksü.

ANOGO ABEN TSÜNGREM DEN

Kodang tsüngremi jembidir, yamaji alir

Yamaji kü bang nungi aoba kü o alitsü: aji amajok nung kü dangi meyipa marutsü, saka aji agi ni aginüba ataloktsütsü aser ni koba asoshi yok iba nung azükarutsü. Isaia 55:11.

Kodang Tsüngremi jembidir, kecha mataloki malir, memelenshir malir. Tetenzük mapang nungi, Tsüngremi jembiba aser kecha makaba nungi alima yanglu. Tsüngremi alima yangludang Pai timi tarensena ka nung (pattern) yanglu: Pai jembi, yamaji liasü, ibaji junga liasü (Lipok 1:3-4). Ibai tarensena Laishiba ajunga jungkai adoktsü; Pai ashiba ama mapa ajak atalok aser Tsüngremi aji junga angu (Fil. 2:13). Tsüngremi tebilemba meshidang Pai jembiba mapa akümstsü ta temulungtetba Pai jembi.

Kodangsa Yisui jembi Pai jembiba ama atalok. Chitemra akettertem Yisu nungi O ka jembibaji taneptsü ta angu (Luke 5:13; 17:14). Nükpokeri Yisu nungi o ka jembibaji angutsü tenük ta angu (Luke 18:42). Yisu nungi atakatem o kaji teraksa ta nütsüngtemi mongu zü nu dong nungi angazük (Mark 11:20). Yisu o nungi temenen puri tatok angur (Yn. 8:11). Lazar shia arudaktsütsü asoshi Yisui kwiben merang? Ken dang (Yn. 11:43). Yisui jembiba o kecha matalok mali.

Yisui ne den jembidang kechi ataloker? Yisui jembiba otem Laishiba nungi azüngdang ne taküm nung temelenshiba kecha makai azünger asü? Yisui Farisitem aitsü kechiaser zülua alibaji metetba ajanga parnok nem taküm agütsütsü ta parnoki amang. Shibai oji jembi paji akatsü melen parnoki o akaba nung temulung süa liasü (Yn. 5:39). Tsüngrem nungi o kaji ne taküm nung koda tashi tait lir! Nai Laishiba azüngdang aser sarasadem dang, Tsüngremi ne taküm asoshi kechi mulung angang.

Kaduna State nung Baptist Arogo ka nungi züngsem 60 puer ao

November 07, 2021: Kaduna kiralongrartem tali pokteter," ta State nung Khristantem tekülem metetdaksü.

sentong tagidak mapang auer Taküm July ita nunga telok ka arua Arogo züngsem 60 Kaduna State kübok Chikum dak tema puer ao, aser tanünga local area nung Bethel Baptist Khristantem tetsübu nung High School nung tatidang atsükadokogo, ta International agitsü lia kaketshir 140 dak tema Christian Concern (ICC)-i puer oa liasü.

metetdaksü. Parnoki tsüraburtem dang, Taoba Amongnü Kaduna nenoki chiyungtsü agütsüra state kübok Kakau Daji nung nenok chirnurtem yaseta Emmanuel Baptist Arogopur mesüdaktsütsü, ta tekülem sentong tagidak metetdaksüba den külemi mapang nung prangpong amer tanurtem chioktsü atema sen telok ka arua parnok aika puer khanga liasü.

ao, aser tang parnoki Tesüiba küm ishika tsüngda Khristantemji chioktsü atema Nigeria nung Kaduna densema sen akhanger, ta Open Doors-i state balala nung nisung puer metetdaksü. aoba kanga bulua ataloker. 2014

Christian Association of Nigeria (CAN) Chairman, Rev. Chibok nung school tanur tetsür kung Haya-i, "Joko onok 200 dak tema puer oa liasü.

Nigeria nung Boko Haram,

Islamic State West Africa Province aser Fulani Nigeria nung Boko Haram, kiralongrartem auyatsü atema kiralongrar aser Islam yimsü züintsü nükjidong nung Khristantem anema inyaker. Nigeria nung telok balalai Libya nungi raraba hadir peria angur aser prangpong amer telok balalai Nigeria nung nisung puer aoba sülen parnok chioktsü atema sen akhangba ya business ka ama kümogo.

OLONG PAITEP # 5991

1		2				3		4		5
				6						
	7		8							
9					10				11	12
			13			14	15			
16					17				18	
			19			20				
21		22								23
24										
							25			

TIPIEN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. ___ tatsü	- (3)
24. Tenüng kasa jatepba	- (7)	12. Tebür kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5990 TELANGZÜBA

TIPIEN :	LANGTSÜNGLEN :
2. Anükalem, 4. Mesak, 5. Apet,	1. Kümdang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.



OSANG TAJUNGTIBAJI KECHI?
(Alokbar telok sensaksemer)

Sobangba : Aya oda tanü asüng ya kecha nunga osang-tsüsang tajung mali, nisung tepsetba, tetsür taküm raksatsüba, corona agi asüba, rakzükkraktemba, ozüng alema sarusajiba, tzümetsüng ajanga ki-o-jen raksatsüba den nisung ponger aoba--oda shiaka meshima lirja, oko Alok, nai danga osang tajung ka shiangma.

Alokba : Ni osang tajungtiba ka shidini?

Telok : Shiang, shiang!

Alokba : Local akshi itzü nung rosep-tosepa sor likaji iba denji chi chiyunger devotional sentepi odikor teka metsükang, Jong!

Sobangba : Waa, aji osang tajung na?

Alokba : Iba dangji tajungba osang ka shiangma.

Telok : Oh Alokba!

Lilir : WhatsApp

TANÜBO NAI LANGZÜANG

Q. Indian bank koba ajanga pensioner atema mezüng 'Video life certificate service' lapoktsü?
 [A] Punjab National Bank [B] Canara Bank
 [C] State Bank of India [D] Bank of Baroda

(Taruba adok nung onoki langzüsü)

YASHIADOK TELANGZÜBA : World Meteorological Organisation

AO OSHI ANGAZÜKDAK:

TANÜ ANGAZÜKTSÜBA OJANG



Lenok

(v) süngdong laodaktsüba (cut down trees)

* Lanubai among nung süngdong tuluka **lenok**.

Lenpi

(v) Lenmang merükteta yanglushi (path clearance/ repairing)

* Yim **lenpii** marurbo takang tulu agir.

NAI-A YA METETTER MA



Italy nung aluyimer kati mapu (Pumpkin) tuluka ka tsünütetba atema otsü tasen yangluogo. Stefano Cutrupi ya Radda, Tuscany nungi lir aser pai tsünütetba mapu ya touzük nung seret 1,226 (2,702 lb 13.9 oz) shi asütsü. Taküm September 26 nü Pisa anasa Peccioli tesem nung 10buba 'Campionato della Zuccone' pumpkin festival sentong agiba mapang Stefano Cutrupi-i iba mapu sayua liasü. 'Great Pumpkin Commonwealth' nungi teshimtet nübutemi iba mapu asadangshia liasü aser mapu ajungba ajitetta iba tetoktepba nung shilem agitsü asoshi Stefano nem temelaba agütsü.

SUDOKU # 6032

	4			7	8					
2			5	6	1	4	9			
	1	3					2	3	7	8
6	3	5		8			2			
7		4		5		9	8			
8				2		7	5	3		
	7	9				5				
	5		9		1		6			
1		2		4	5	3		7		

TELANGZUBA # 6031

	9	2	1	7	6	3	8	5	4
	6	4	5	1	8	9	3	2	7
	3	7	8	5	2	4	6	9	1
	1	3	2	9	5	8	7	4	6
	8	6	9	2	4	7	5	1	3
	7	5	4	6	3	1	9	8	2
	4	9	3	8	7	2	1	6	5
	5	1	7	4	9	6	2	3	8
	2	8	6	3	1	5	4	7	9

OJANG LUTEP # 5578

BEAIN :

JBIEMR :

SHTAI :

NGARMAA :

ENEAIBELR :

MNE :

TRENEMESHI :

SSÜAGÜTTÜ :

ANLGA :

RLI :

OJANG LUTEP TELANGZÜBA # 5577

JUNGA INYAK YONGJIA SHISATSÜ MEMERÜKERI TANGAR
 INYAKBA NUNG TEMULUNG MALEMER

TAN HOPTA ATEMA - KOMA SÜLA ?

Q. Akhidang ama, ABAM kübok lanurtem ya küm shia lanur mungdang (Youth Convention) ya Impur nung dang melii, tagizüker dang lira, yimtsüng aser town arogotem nung among nunga koma süla ?



November 08, 2021 nü New Delhi nung Youth Congress züngsemtemi 2016 küm Centre sorkari demonetization benokba anema longkak aitdang sepaitem den raraba noksa nung angur.

Delhi BJP MLA temi petrol aser diesel nung VAT saru ajemtsü akhanger

New Delhi, November 08 (Agencies): Hombarnü Delhi BJP MLA tem aser Delhi BJP unit Tir, Adesh Gupta nungeri Chief Minister, Arvind Kejriwal'er kima longkak aita petrol aser diesel nung value-added tax (VAT) saru ajemang, ta takhangba agütsü.

November 3 nü Centre sorkari petrol litre shia nung sen 5 aser diesel litre shia nung sen 10 ajemtsü, ta sangdongba sülen state aikati VAT saru ajemogo.

Osangbener den jembidang Gupta-i, "Petrol aser diesel

nung VAT saru ajemang ta temepishiba shidi ka Kejriwal nem agütsütsü atema onok yagi aru, ajisüaka election atema nüboyimtsü atema pai tanga state tem sema senzüdar ta onoki angazükogo. Tanga state temi VAT saru ajemtetra kechiba Delhi sorkaribo majemteter?" ta asüngdang.

Delhi BJP Tir, Gupta-isa, Kejriwal-i Delhi nüburtem atema mebilemstür, saka tashi arishitsü atema yimtenren nung ang rangloker, ta ashi.

November 7 nü AAP lenir aser Delhi Deputy Chief

Minister Manish Sisodia-i, nüburtem anisüngzükdaksütsü atema AAP sorkari petrol aser diesel nung VAT saru ajemtsü atema mera agia inyakdar, ta metetdakja liasü.

Centre sorkari petrol aser diesel jenjang ajemtsü, ta sangdongba sülen anogo ka lir BJP-i yimsüsüba state temia petrol aser diesel nung VAT saru ajemtsü, ta sangdong.

Amongnü Punjab nunga Congress sorkari petrol litre ka nung VAT saru sen 10 aser diesel litre ka nung saru sen 5 ajemogo.

Cabinet Committee-i Nov. 29 nungi Parliament amentsü benok

New Delhi, November 08 (Agencies): Cabinet Committee on Parliament Affairs-i asükwa mongpu Parliament November 29 nungi December 23 tashi amentsü benokogo, ta Hombarnü osang ka ajanga metetdaksü.

Tesüiba küm ka ser tesadang tsüingda Parliament amenba ama taruba asükwa mongpu Parliament nunga coronavirus wara anema tetuyuba balala beshitsü.

Asükwa mongpu Parliament senden ajak senteper 20 asütsü.

Coronavirus wara ajanga yakumbo asükwa mongpu Parliament mamen aser Budget senden den külemi tzungluruwa mongpu sendena atsülanga liasü.

"Defence Minister Rajnath Singh leniba nung amenba CCPA (Cabinet Committee on Parliament Affairs) senden nung asükwa mongpu Parliament November 29 nungi December 23 tashi amentsü benoka liasü," ta osang ka ajanga metetdaksü.

Parliament House anaprong (Rajya Sabha aser Lok Sabha) mapang ka nung dang amentsü aser züngsemtemi tangar anasa maoba den wara anema tetuyuba balala beshitsü.

MP tem densema Parliament nung staff ajaki masks agitsü aser senden metenzükdang ajak dak coronavirus tendangtsü.

Sangküm küm tetenzüklen Uttar Pradesh densema state

pongung nung assembly elections agitsü lia Parliament amentsü, iba sülen Budget senden amentsü.

Taruba Parliament nung opposition party temi tongtibang onük aika nung sorkar anema nokdaksüa akok; item onük rongnung- osettsüset jenjang kanga atuba, Kashmir nung kiralongrartemi civilian tepsetba, Lakhimpur Kheri nung aluyimertem menüngsetba aser aluyimertemi ozüing tasen asem anema longkak aitba densema lir.

Taküm tzungluruwa mongpu senden nung opposition party temi tongtibang süa Pegasus onük nung o tokteptsü akhangba den aluyimba ozüing asem agientsü takhangba agüja liasü.

Jaitley aser Sushma densema nisung 119 nem Padma Award agütsü

New Delhi, November 08 (Agencies): Hombarnü Rashtrapati Bhawan, New Delhi nung linük Tir, Ram Nath Kovind-i taoba mapang Union Minister ana- Arun Jaitley aser Sushma Swaraj na aser actress, Kangana Ranaut nunger densema nisung 119 nem awards agütsüogo.

Taküm Padma Vibhushan award nisung 7, Padma Bhushan award nisung 10 aser Padma Shri award nisung 102 nem agütsü. Award agizükertem rongnung tetsür 29, asür 16 aser transgender ka densema liasü.

Award agütsüba sentong nung linük tatong tir, M Venkaiah Naidu, Ato kilonser, Narendra Modi, Union home minister, Amit Shah aser Union external affairs minister, S Jaishankar nungera densema liasü.

Padma Awards ya India nung temaba civilian award lir, aser küm shia Republic Day (January 26) matongdang jelia iba award angutsüpur sangdonger.

Item Awards ya categories asem nung agütsür aser itemji: Padma Vibhushan, Padma Bhushan aser Padma Shri lir. Item awards ya nübur tenzükba maparen lenla balala nung tangar dang nungi alakteta junga inyakba atema agütsür.

Padma award angurtem rongnung kar:

Hindustan classical kentener, Pandit Chhannulal Mishra-i Padma Vibhushan angu. 2010 küm nunga pai Padma Bhushan ngua liasü aser 2000 küm Sangeet Natak Akademi Award ngua liasü.

BJP lenir aser taoba mapang

external affairs minister, asür Sushma Swaraj-i Padma Vibhushan award angu. La temelungjang tashidak agi 2019 küm August 6 nü asü.

Padma Vibhushan angurtem rongnung taoba mapang Union minister ana- asür George Fernandes aser asür Arun Jaitley nata densema lir.

Padma Bhushan awards angurtem rongnungsa badminton asayar P V Sindhu, lokti tenzükker Dr Anil Prakash Joshi, nübur tenzükba mapanung Dr S.C Jamir aser tamangba yimsü tsütsü Mumtaz Ali nungeri iba award angu.

Air Marshal, Dr Padma Bandopadhyay-i Padma Shri award angu. Indian Air Force nung tetsürtem rongnungi mezüngbuba Air Marshal jenjang angurji la liasü. Kentener Adnan Sami aser actress Kangana Ranaut nati Padma Shri award angu.

Tetsür hockey team captain, Rani Rampal-ia Padma Shri award angu. Taküm küm tetenzüklen Rampal leniba nung India tsür hockey team-i Tokyo Olympics 2020 nung shilem agi.

Taoba mapang Indian Council of Medical Research nung scientist, Dr Raman Gangakhedkar nem Padma Shri award agütsü. Dr Gangakhedkar ya tangbo World Health Organisation (WHO)-i coronavirus wara indang study asüba expert group nung züngsem ka lir.

Lenla balala nungi Suresh Wadkar, Karan Johar, Ekta Kapoor, Sarita Joshi aser asür SP Balasubramaniam nungeria Padma Shri award angu.



Hyderabad, November 08, 2021: Hombarnü Hyderabad nung Telangana IT & Industries Minister, K T Rama Rao aser actor Sonu Sood nati coronavirus wara mapang nung timtemertem yariba nija, melungtet telok aser organisation balala nem sempet agütsüba noksa nung angur. Iba sentong ya Social Impact Group (SIG)-i ayongzük.

Angopur ka khasetba atema India-i Pakistan ketdangser ka jaok

New Delhi, November 08 (Agencies): Pakistan Navy-i India nunger angopur ka khasetba atema Ministry of External Affairs-i Pakistan nunger tongti ketdangser ka jaok.

Iba tatalokba atema India-i Pakistan High Commission jaok.

Honibar nikongdang 4:00 ako meta Gujarat tzüyimkümlen nungi pilar Arabian tzüyim nung international maritime boundary line anasa Pakistan Maritime Security Agency (PMSA) sepaitemi India nunger angopur

ka khaset aser ka mejungi yiruja liasü.

Pakistan sepaitemi khasetsangji Maharashtra nungi angopur arrshi küm 32, Sridhar Ramesh Chamre liasü ta jangjaogo.

October 25 nü 'Jalpari' rongnungji nisung tenet mener Okha nungi apusoa liasü. Par tenetji Gujarat nungi nisung pongu aser Maharashtra nungi ana liasü.

Iba tatalokba atema Porbandar Navi Bandar police-i ken o ka benokogo.



Ranchi, November 08, 2021: Hombarnü Ranchi nung Maoists telok nung commanders- Balon Sardar, Raimuni Kumari (Geeta Munda) aser Gaju (Suraj Sardar) nungeri police matsüngdang 'surrender' asüba noksa nung angur.



Romania nung COVID-19 mozü agiba, green pass aser COVID-19 dak sendakba tenokdangbatem benokba anema Bucharest, Romania nung nüburtemi banner tuluka nung "Vaccine magitsü - Ozü tanur ya ner Bucharest ak masü" ta zülua amer jajaba angur. Romania yimtiba nung longkak aiter temi lenmang mokdangaka sepaitemi nokdaker repranga ata liasü.

China-i missile tendangtsü atema US Navy rong mesüka yanglu

Washington, Yimpoksüi/ Nov. 08 (Agencies): China mitkari Xinjiang lisem lima nung US Navy aircraft carrier aser danga warships tem mesüka yanglu aliba, Maxar satellite indang noksatem ajanga sayuogo. Item rongtem ya targets tendangtsü atema yangluba asütsü ta bilemer. Taiwan aser South China Sea dak sendakba nung Washington den mangatetep adoker aliba mapang ka nung item rongtem yanglua aliba ajanga China-i US Navy anema mejeta anti-carrier capabilities yanglutsü merangba sayur. Satellite noksatem ajanga, US carrier ka aser Arleigh Burke-class guided missile

destroyers ana indang full-scale outline ka sayuogo, koba Taklamakan lisem lima nung target range complex tasen ka asütsü ta bilemer. Iba complex ya ballistic missile tendangtsü atema amshir, ta geospatial intelligence company All Source Analysis-i ashiba US Naval Institute-i metetdakja liasü. China indang anti-ship missile program tem ya People's Liberation Army Rocket Force (PLARF)-i achaayanger. Iba ken o dak sendakba nung China indang defence ministry-i kecha telangzüba agüja mali. China indang military dak

sendakba nung Pentagon indang tatem sabuba annual report nung, PLARF-i 2020 küm July ita mezüngbuba South China Sea nung live-fire launch süa liasü. Parnoki DF-21 anti-ship ballistic missiles trok Spratly asetkong anüdoctip len khaloktsü. Iba tesem nung China aser Taiwan densema Asia linük pezü mangatetep adoker lir. US Secretary of State Antony Blinken-i taküm July ita, South China Sea nung Philippines makra United States-i parnok puküma nokdaksü ta ashiba den China dang tangar amokmerenba inyakyim anentsü tekümdaksü metetdaksüogo.

Covid-19: US-i Hombarnü nungi bendanger agizüktsü

Washington, Yimpoksüi/ Nov. 08 (Agencies): United States-i Hombarnü nungi tenzüka bendanger senzisenpongtem par linüki aita daksütsü. Covid-19 tashidak den raratsü atema ita 20 tashi linük shibanga ayuba sülen tang iba jenjang agiogo. Ajisüaka US-i aotsüpurtem ajak vaccine ajunga agir alitsü nüngdaker. America nunger masürtem aser immigrant masürtem ajaki US-i aoba tayimtsü nung tua mamen tsüngda vaccine agiba kuli sayutsüla. Tanur arishi küm 18 tekübokpurtem shirnok clinical trials nung shilem agidar, vaccine agiba ajanga timtem adokertem aser humanitarian maparen atema jongdak senzisenpongtem iba talenba küboki maittsü, ta October ita US sorkari tetuyuba agütsüba nung shia lir. Ajisüaka tanür arishi küm 2 tekübokpurtem dak alia ajak dak Covid-19 tashidak tendangtsü. Senzisenpong nung tetuyuba tasen agütsüba ya benoktsü atema Airline tem nem khuret agütsüogo. Taoba mapang inyakyim tasenba dak sendakba nung osang kakertem nung sangdongba kübok airlines temi senzisenponger ket nungi official source kati agütsü vaccine agiba kuli sayutsü nüngdaker, ta shia lir. Official

source ya vaccine agütsüba linüktem nung public health agency, government agency amala asütsü. US citizens, non-citizens, immigrants aser non-immigrants amala senzisenponger ajaki senzisenpong metenzük tsüngda ghonda 24 lia agiba Covid-19 negative test report sayutsüla. Inyakyim tasenba kübok airlines temi WHO-i temelaba agütsür aliba vaccine agir alirtem agizüktsü. "FDA-i temelaba agütsür aliba vaccine dose mashika agir hopta ana lir tatembangbuba dose agir alirtem mesera WHO EUL-i (emergency use listing) temelaba agütsür aliba single-dose series (i.e., Janssen) mesera FDA-i temelaba agütsür aliba dose mashi ana mesera WHO-i jongdak mapa amshitsü atema temelaba agütsür aliba Covid-19 two-dose series (i.e. mixing and matching) agir alirtem ya vaccine ajunga agir alirtem ama züngshitsü," ta White House-i taoba mapang metetdakja liasü. WHO-i vaccine 10 agizükogo. Vaccine 10 rongnung Serum Institute of India indang Covidshield densema lir, koba AstraZeneca indang vaccine Indian version lir. US-i iba vaccine amshitsü temelaba agüja mali saka rizünga ayutsü atema dose million aika mekazüka yua lir.

Transition sülen Sudan sorkar nung shilem magitsü: Burhan



Abdel Fattah al-Burhan
Khartoum, Yimpoksüi/Nov. 08 (Agencies): Sorkar inyakyim melenshiba mapang sülen aruba sorkar nung shilem magitsü aser mitkartemi sorkar atsüngdokba anema longkak aiter asüba ya mitkar mapa masü, ta Sudan indang army chief General Abdel Fattah al-Burhan-i ashi. October 25 nü mitkartemi tashiyim amshia sorkar atsüngdokba sülen linük tesem ajungalen mitkar mapa anema longkak aiter, saka sepaitemi meyiper longkak aiter dak azüdokshir. Tang tashinung longkak aiter nisung 14 tepsetogo aser 300 shi yiruogo, ta Central Committee of Sudanese Doctors ajanga ashir. "Democratic yimya nung yimtenren melenshiba maparen tembangtsü, mapang shidak nung elections agitsü aser

constitutional declaration talenba kübok timtem madoktsüsa yimten inyakyim kecha menokdangtsü onoki onok dang, Sudan nübur aser alima kin ajunga dang nangzüka lir," ta al-Burhan-i osangbener dang ashiba Deobarnü sangdonga liasü. "Linüki temolung lemtetba civilian sorkar nem tashi amoktsütsü asoshi onoki nendaka inyaker aser iba temelenshi nung timtem agütsütsüsa kecha marudaktsü wazüka ayutsü nangzüka lir," ta pai ashi. Longkak aiter asüba ya mitkartem mapa masü, ta al-Burhan-i ashi. "Sudan mitkartemi nüburtem metepset, aser kechi atalok aji temai adoktsü atema bushisüngdangba committee tem lir," ta pai ashi.

Linük yimtiba, Khartoum aser danga jila tem nung mitkartemi sorkar atsüngdokba anema maneni longkak aita mapang iba sensaksem ya sangdonga liasü. Khartoum nung education ministry kimalen mitkartem anema tesayur kar longkak aita liasü. Deobarnü Khartoum nung longkak aiter 80 shi apu, ta teachers' union ajanga ashi. Nisung asüba osangbo mali. "Sorkar ka tentetsü asoshi political party aser ato kiloner menden nungi atsüngdoker alisang Abdalla Hamdok densema lenirtem den jembishinüba mapang lir ta Burhan-i ashi," ta Burhan den jembisang Al Jazeera indang osangbener Resul Serdar-i ashi. "Tetsükdaksü balala liaka ghonda 24 tsüngta tangatetep kati arutsü imlar ta pai ashi." Mitkartemi tashiyim amshia sorkar atsüngdokba anema Deobarnü longkak aita mapang Sudan security forces temi tear gas khaloktsü, aser yimti kar nung ananü civil disobedience alitsü ayongzüka nung nüburtemi shilem agir. Sudanese Professionals Association (SPA) lenisüba kübok civil disobedience ya ayongzüka liasü. Mapang talangka longkak aita arur 2019 küm April ita Sudan lenir Omar al-Bashir menden nungi

atsüngdokba maparen nunga SPA yagi shilem tulu agia lir. "Mitkartemi tashiyim amshia sorkar atsüngdokba ya Sudan nüburtemi magizüker," ta SPA ajanga ashi. Sorkar atsüngdokba sülen Sudan yimti aika nung internet shibanga lir, anungji SPA ajanga ayongzüka civil disobedience osang ya text message ajanga prokshia liasü. Mitkar anema longkak aiter nisung noklang aika Khartoum aser Omdurman, Wad Madni aser Atbara yimitem nung adenshia longkak aita liasü. "Tashi ya nübur meyong lir, mitkar yimsüsüba magizüker," ta parnoki yimiyim ayima civilian sorkar ka khangas liasü. "Longkak aiter temi yimti-yimti nung mokdang, gari tyre tem mi nung arong aser mitkar yimsüsüba anema ola adok aser nüburtemi civilian sorkar ang aginer, ta ayimtena liasü," ta Omdurman nung alir kati ashi. Mitkartemi sorkar atsüngdokba ajanga alimai aitsü, teyari balala agütsüba anenadok aser tekeraba nung civilian nem yimsü südaktsütsü takhangba agüja liasü. Al-Burhan-ibo ibai mitkartemi tashiyim amshia sorkar atsüngdokba masü saka transition yimya jangashiba ka lir, ta ashi. Tashi tait Rapid Support

Forces nung tanishir, shiba Sudan mitkar nung No.2 nung lir, paia mitkartemi sorkar atsüngdokba busema jembiba Facebook nung post sütsü. Nüburtem temelenshi maparen nung aibelenba metongshitsü aser linük security aser linük tashi ita aliba wazüka ayutsü mechi General al-Burhan-i iba mera ya agi, ta General Mohamed Hamdan Dagalo-i ashi. Pa dang Hemedita ta ajar aser tang anener aliba Sovereign Council nung Burhan indang deputy liasü. Deobarnü high-level Arab League nungi teshimtet lenirtemi al-Burhan aser civilian lenir Abdalla Hamdok na den tesem balala nung senden mena mitkar aser civilian lungjemer yimsü asütsü indang jembia liasü. Hamdok ya tang tashi Khartoum nung par kidang pua yua lir, pai sorkar ketdangtsür aser yimten yimsüsürtem pua aliba chioktsü ajungshia liasü. Ajidang masü paibo mitkartem nem sorkar matsüngdokba mapang tashi lemsar yimsü asüba jenjang nung alitsü nangzükdaktsüner, ta ketsangtsürtemi ashi. Brehostibarnü mitkartemi sorkar indang civilian lenir pezü chioka liasü saka tongtipang ketdangtsürtem tang tashi mechioki yua lir.

District Horticulture Office Kiphire-i KVK Centre tem semdang

Kiphire, Yimpoksüi/ November 08, 2021 (TYO): District Horticulture Office Kiphire-i October 26, 2021 nungi tenzüka November 03, 2021 tashi State kübok district balala nung KVK center tem semdanga liasü, ta sangdong ajanga metetdaksü.

Iba technical team nung Sentinungba Longchar, DHO Kiphire lenir liasü aser pai anir team-i aluyimer kar indang alu/ tsünisembongtsü yokba tesem tem semdang.

MIDH programme akhüm kübok iba state tour takok ngua agiogo, kong technical staff temi aluyimba wadang nung inyakyim tasentem ajangshiogo.

Item KVK center semdangba mapang, institution balala nungi shisalen sayur balalai shilem tajung agiba atema, team-i parnok dang pelaba metetdaksü, ta kasa sangdong nung shia lir.

MAMATETER

Asür IMOLANGBA (Chuchuyimlang)
09-11-1996

Temeim Oba!

Nai onok toktsür kümsük 25th tashi sua oaka, ne temeim aser mapa tajungtem onok mulung nung teti alir. Tanüa na onok den dena ali ama menungra bilemteter.

**Kinungsü, Chirnur,
Semchisemnur aser
Kinungertem**



OFFICE OF THE
MERANGKONG SENSO TELONGJEM, TULI
P.O. TULI, PIN - 798618
Dist. Mokokchung, Nagaland.

TENÜNGSANG AGÜTSÜR

Wb. Marsanen Imsong S/O, Lt. Yaongnok Imsong, Merangkong, Pa Langpangkong Tzükong Mungdang nung Tir ka ama shima jenjang tulu ngutetba temoatsü asoshi Merangkong Senso Telongjem Tuli menden ajanga Pa nem tenüngsang agütsür.

Tzükongsanger tenzüksü asoshi teyanglur Tsüngremi Pa taküm aser sempet maneni moajangma.

Sd/-
**(Er. LANUKABA B)
President, MSTT**

Sd/-
**(I SENTINANGBA LKR)
General Secretary, MSTT**

Menungra Bilemteter

Late Limatemjen I Longkumer (Aonokpu)

08/12/1980 - 09/11/2020

Nai onok toktsür küm ka jungaka, anogoshia na onok mulungjang nung teti alir. Ne mapa tajung aser ajemalu nela menungra bilemteter. Anogotem songtema küm süa oaka na onok mulungjang nung teti alitsü aser ne mapa tajungtem kodanga mamatsü. Kenü anogo Kotak nung ajuruteptsü ta teimla nung onok mulung anisüngzüker.



Temeim Tsürabur, adianu aser kinungertem.

Office of the

Wameken Students' Union Tzudikong Unit TENÜNGSANG AGÜTSÜR



Wameken Students' Union Tzudikong Unit ajanga Kr. Moasenla, Lt. Yanger Imsong aser Mrs. Jongponnenla na jala, lai Miss Mokokchung 2021, takok korang nguteta kaketshir ajak asoshi konang nungsang bener arutsü nung pelaba lemsateper.

Iba takok korang ne dak aketba sempet tajungtiba agi ngutetogo, tarutsü nunga kaketshir aser nübur ajak asoshi tatishitsü tajung angutsü yimlar. Tsüngremi moajang !

Sd/-
Imnajungba, President

Sd/-
Nungsangyala, G.Secretary

18buba Sunsilk Mega Miss North East atema audition agütsü



Kohima, Yimpoksüi/ November 08, 2021 (TYO): Mega Entertainment, koba north east indang fashion aser pageant sentong tayonger tulutiba lir, iba tentet ajanga 18buba Sunsilk Mega Miss North East atema audition sangdongogo.

Iba audition agiba mapang, pageant ayongertemi Northeast State 8 nungi tetsür 50 shimtsü, shirnoki 18buba Sunsilk Mega Miss North East title atema tokteptsü.

Nagaland atema, 'state audition' ya Vogue Entertainment, Nagaland den longjemer November 10, 2021 anepdang 11:00 meta Crescent International Hotel, Kohima nung ayongzüksü terenemba lir.

Iba audition (Nagaland) nung tar (height) masü, saka pei aketba sempet/jakla nung candidate tem tendangtsü.

Northeast nung lanurtem atema tatishitsü tajung ka asütsü aser temelenshi adokdaksütsü atema iba pageant yagi candidate tetemjen shimtsü tebilemba lir.

Sunsilk Mega Miss North East ya fashion entrepreneur

Abhijit Singha indang asalentong ka lir aser 2003 küm iba sentong tenzüka liasü.

Iba Pageant sentong nung, Northeast State 8 nungi tepor tajung aser sempet tajung alir tetsürtemi shilem agiba angutsü aser Guwahati nung grand finale sentong agütsü.

18buba Sunsilk Mega Miss North East ya brand tulu talisa Sunsilk, Radisson Blu, Eyetex Dazzler, Sohumi aser L Gopal Jewellery Pvt. Ltd ajanga nungittsü.

18buba Sunsilk Mega Miss North East nung, takok angur asem nem takok korang, senpet, nungtugu fashion photographer Prashant Brahma ajanga portfolio shoot, Mafiz's Academy Cum Studio ajanga makeover den külemi Glam Mantra ajanga takok angur atema (reigning term) 'public relations and reputation management' densema sen lakh 2 alang sempet agütsütsü renema lir.

Item dak alia, takok angurtem nem Mega Entertainment ajanga 'professional representation aser personal wardrobe styling' agütsütsü, koba ajanga takok

angurtem indang wadang nung yaritsü.

Ano, iba sentong nung takok angur asempronglai Northeast indang nungtugu fashion sentong balala nung shilem agütsü asoshi maongka angutsü. Iba den külemi, show indang sponsor aser charitable partner tenüng nung tangalen senzütsü asoshi takok angurtem nem maongka agütsütsü.

18buba Sunsilk Mega Miss North East dak sendakba nung, State audition nung shilem agütsü asoshi tejangrartemi www.megaentertainment.org nung form download sütettsü mesüra ph.no. +91 89747 88525 /88374 03857 nung tongteprateptsü akok, ta sangdong ka nung, Managing Director, Vogue Entertainment Nagaland aser state director Sunsilk Mega Miss North East, Dode Nakro-i metetdaksü.

Neeraj, Chanu aser Punia nungeri Mobil India indang brand ambassador maneni inyaksü

Dimapur, Yimpoksüi/ November 08, 2021 (TYO): Tokyo Olympics nung medal angur Neeraj Chopra, Mirabai Chanu aser Bajrang Punia nunger ya Mobil India indang brand ambassador maneni inyaksü, ta ExxonMobil Lubricants Pvt Ltd ajanga Honibarnü sangdonga liasü.

New Delhi nung company indang top retailer matsüngdang item athlete nem tenüngsang agütsüba sentong agiba mapang, ExxonMobil Lubricants Pvt Ltd ajanga iba osang sangdonga liasü.

Tokyo 2020 nung India athlete temi junga shilem agiogo, kong asaya balala nung athlete temi medal 7 tashi takok angu.


Iba asayamung nung, Neeraj ya gold medal (individual) angur rongnung mezüng track & field athlete aser India nunger rongnung pa tanabuba aküm. Ano külen Olympics nung silver medal angur Indian weightlifter rongnung Mirabai Chanu mezüng aküm. Bajrang Punia Tokyo Games nung, Bronze medal ngua liasü aser World Wrestling Championships nung medal asem angur Indian wrestler rongnung pa asütsü.

ExxonMobil Lubricants, CEO, Deepankar Banerjee-i, "Neeraj Chopra, Mirabai Chanu aser Bajrang Punia nunger den maneni tenangzüktep agütsü maongka anguba atema pelar. Parnoki alima sabang nung

temaba jenjang majangzüktet dang onok tsüngda iba maparen tenzüik aser Olympics nung parnoki pei pei tata asaya nung takok ajangzüktetta medal angudang onok pelar. Athlete temi India nem tenüng tajung bener aruja aser parnok saisapong nung temelenshi tulu adokdaksüba ama, onok longjemer iba brand atema maneni meranga inyaksü," ta ashi.

Iba sentong agiba mapang, ExxonMobil Lubricants-i brand inday product tasentem - Mobil Super SUV Pro aser Mobil Super Moto2W engine oil sayuogo. Tawa, item product ya Neeraj Chopra, Mirabai Chanu aser Bajrang Punia nungeri advertising campaign ka ajanga sayaa liasü.

Peren District Departmental Badminton Tournament tembangogo



Dimapur, Yimpoksüi/ November 8 (TYO): 7buba Peren District Inter Departmental Badminton Tournament shibangba sentong November 6 nü Indoor Badminton Stadium, Jalukie nung agiogo. Iba sentong nung Deputy Commissioner Peren, Sentiwapang Aier, NCS alaketa jaoker liasü.

Tebur kija asaya Anozo Viswentso-i (Prison) akok aser Sidibo-i (Social Welfare) runner up liasü. Tebur tarep asaya Haidingsap Mpom

& Jacob Siang (9th IR, Saijang) nati akok aser Asembe Mbungcha & Irangzaing (PWD) na runner up liasü.

Tetsür tarep asaya Lhingneivah Hangsing & Lhingneithem Singson (SDEO) nati akok aser Haikiamle & Iramheile (Social Welfare) na tanabuba jenjang nung liasü.

Tarep temeyoktep final asaya nung Chingkhokai Singson & Lhingneithem Singson (SDEO) nati Samrang & Pelunwi R. Newmai na koka liasü.

Asaya akoker aser

tanabuba jenjang nung tembangertem nem senpet, medal aser kuli kaket Deputy Commissioner, Peren-i ADC Jalukie, ADC Peren aser tanga ketdangsurtem matsügang agütsü. Kasa mapang nung DC-i takokertem nem tetsügang agütsü aser asayamung shilem agir ajak dang pelaba lemsatop.

Asayamung shibangba sentong ya SDO, PWD (R&B) Peren, Er. Asembe Mbungcha lenisüba nung agi, aser DSO Peren, Asekho Talie-i tepela anküp o jembi.

Djokovic-i Medvedev koka Masters title 37buba kokogo

Yimpoksüi/November 8, 2021 (Agencies): No. 1 jenjang nung küm tenetbuba atonga season tembangtsü jangjaba sülen Novak Djokovic-i Deobarnü Paris Masters final nung No. 2 asayar Daniil Medvedev 4-6, 6-3, 6-3 agi koka Masters title 37buba kokogo.

Djokovic-i Rafael Nadal dang nungi Masters title ka agi timba koka otsü tasen ka yangluogo aser pai Roger Federer dang nungi Masters title teku agi timba kokteta lir.

Iba den külemi Djokovic-i Paris Masters title trokba koka otsü tasen ka yangluogo. Pa aser Medvedev na tsüngda tang tashi nung 10 ben asayaogo aser pai trokben aser Medvedev-i pezüben koka lir.

Ita ana tejakdang U.S. Open final nung pa Medvedev-i tsükdaktsü aser iba sülen pa asayamung ka nung danga shilem magi liasü.

Medvedev-i asaya kanga tashi ita tenzüik, ajisüaka pai rally talanga asayaba tizüka asayaa liasü.

Tatembangbuba set nung Medvedev belemadok aser

Djokovic-i serve ana tashi break süa 5-2 agi pa tejakdang aküm.

Asaya nung 30-40 nung serve asüba mapang fan temi asaloktsüba atema Medvedev tezü danga pai lokti dak ball ka zükloktsü aser melentepba mapang lokti dak tuyua liasü.

Asaya nung fan tem kari serve opetdang aser double-faults menadang cheer asü. Parnoki hopta tepeyong asayartemi serve asütsü mapang asatapa liasü.

Chair umpire Aurelie Tourte-i iba yimya azüoktsü atema mepeshia asüngdanga liasü. Honibarnüa umpire temia lokti dang masateptsü mepeshia liasü.

"Asayartem serve asütsü atema baseline nung nokdaker aliba ngura tasatop," ta lai ashi.

Tasembuba set nungsa Djokovic-i serve junga maoba sülen Medvedev nem pa indang serve break südakja 5-3 aküm.

Ajisüaka mezügbuba match point asayaba mapang asayar ana tsüngda talangka sütepa asayaba sülen Djokovic-i iba point angu.

"Ni kanga kangshiogo; nai kanga junga asayaogo. Ni kanga koknüa liasü saka na kanga tashi tait," ta Medvedev-i French oshi nung ashi. "Iba amala asaya ano aiben asayatsü aser ishishi akoktsü imlar."

Medvedev-i French jembiba ngua Djokovic süngmangdaktsü. "Nai French oshi jembiba jenjang ya tesüngmangtsüka. Ni Danill ama mejembiteter saka ni merangdangtsü," ta Djokovic-i French oshi nung langzü.

"Nia tanü kanga kangshiogo aser New York nunga kanga kangshiogo, saka ana tsüngda tetoktepba tajung ka adokdar," ta pai ashi.

Iba takok ya Djokovic-i pa kinungtsü aser jabaso aser jala den benjunga liasü.

"Tanü ya ni asoshi kanga tongtibang anogo ka, kechiyong ozü kibong idaki lir."

"Tanü mezüngbuba ozü tanur anaprongla ni asayaba reprangi arua lir," ta pai ashi.

Game trokba nung 30-40 agi mekoki Medvedev-i serve asüüba mapang pai break point ka kümzüik. Asaya nung arishi küm 34 tain Djokovic-i break points ana tashi kümzüiket saka Medvedev-i sliced backhand drop shot ka yoka serve break asü.

Iba sülen arishi küm 25 tain Russia nunger asayar yagi pa indang serve break mesüdaktsü mezüngbuba set akok.

Tanabuba set nung serve ka break süa Djokovic 4-1 agi pa tejakdang aküm. 5-3 agi tejakdang ser serve asüba mapang pai break points asem tashi kümzüika liasü.

Syed Mushtaq Ali Trophy: Nagaland-i Arunachal kokogo

Dimapur, Yimpoksüi/ November 8 (TYO): Tang asayaa aliba Syed Mushtaq Ali Trophy nung tanü Nagaland team-i run 79 agi Arunachal madak takok nguogo. Iba asaya ya ACA Cricket Ground, Malapadu nung asayaa liasü.

Toss akokba sülen Nagaland team-i mezüng bat asütsü shim aser parnoki asayar 7 out ser run 165 yanglu, koba iba asayamung nung team-i run timtiba yangluba liasü.

Nagaland team-i asaya

kanga junga tenzüik aser Captain Jonathan Rongsen aser Joshua Ben Ozukum na senteper run 49 yanglu. Asaya nung Jonathan Rongsen-i run 27 yanglur aliba mapang Niia-i pa out sütsü saka Joshua-i maneni kanga junga asayaa ball 54 nung run 91 yanglu. Joshua-i Four 8 aser six 4 züka liasü.

Arunaalah atema Doria-i wicket 3, Akhilesh Saina-i wicket 2 aser Niia o RB Bishnoi nati wicket kaka agi.

Asaya tanabuba shilem nung

Arunachal team-i asaya kanga junga tenzüik aser opener ana senteper run 50 yanglu. Ajisüaka Khrievitso Kense-i Doria out süja iba partnership (53 runs) raksatsü.

Iba sülen Imliwati-i ball kanga junga ona pa indang mezüngbuba over nung wicket asem agi aser iba ajanga Arunachal middle order batsmen anokshitsü aser tanaben junga masayateti over 15 nung run 86 yanglur parnok ajak out süma.

Nagaland team atema Imliwati-i wicket 4, Khrievitso Kense-i 2, Hokaito-ia wicket 2 aser Jonathan Rongsen-i wicket 1 agia liasü.

Nagaland team tatembangbuba asaya November 9 nü Tripura den Gokaraju Liala Gangaraju ACA Cricket Ground, Malapadu nung 8:30 ako nungi tenzüka asayatsü, ta NCA, Hon. Secretary, Hyunilo Anilo Khing-i sangdong ka ajanga metetdaktsü.

MPH nung facility amshitsü maongka agütsür

Dimapur, Yimpoksüi/ November 8 (TYO): Nagaland Legislative Assembly Secretariat nem Multi-Purpose Hall (MPH) achaayangtsü atema nongloktsüogo. Multi-Purpose Hall (MPH) nung Badminton Courts asem aser top class Gym ka lir, koba tawa NLA Complex nung lapoka liasü. NLA-i item facility tem ya Assembly züngsem, support staff, Government of Nagaland aser Assembly Secretariat indang

Officers/Staff tem atema 15.11.2021 nü nungi lapoktsütsü telemetba agiogo.

Facility tem amshitsü atema:

1. Tejangrartem ajaki MPH amshitsü atema khen asoshi non-refundable Fee sen 2,500 agütsütsüla.
2. Hall nung aliba facility ajak amshitsü atema ita shia sen 1000 agütsü, koba ita shia 1 nungi 5 tsüngda Management Office nem agütsütsü.
3. Assembly züngsemtem dang

taa magütsü. Ajisüaka Hon'ble Member tem indang personal staff shirnoki iba facility amshiner, parnok dang Nagaland Legislative Assembly Secretariat Officers aser Staff tem dang meshiba taa meshitsü.

4. Assembly indang Ex-Member tem-ia Registration Fee aser user-fees agütsür facility amshitetsü.

5. Gym-trainer indang service ya züngsemtem aser taa agütsür

amshirtem ajaki agitetsü.

6. Züngsemtem ajaki Nagaland Legislative Assembly Secretariat-i mapashia agütsüba guideline tem sülen anidaktsüla.

7. Membership Fee ya facility amshitsü atema lir.

8. Guest züngsemtem shirnok züngsemtemi recommend süogo, parnoki anogo nung sen 100 agütsür facility tem amshitetsü.

9. User-fee ya mapangshia melenshia alitsü.

Iba facility amshinertemi November 5 nungi 15 tsüngda anepdang 9 nungi 10 aser nikongtsütsü 4 nung 5:30 tsüngda MPH nung Management Team office nungi Membership Form meshitetsü. Form ya tawa tangokba Passport size/Stamp size ana densema benoktsüla.



Tir Ram Nath Kovind-i Oinam Bembem Devi nem saiapong atema Padma shri award agütsüba noksa nung angur. La ya taoba India tetsür football team captain liasü aser la dang "Durga of Indian football," ta aja. Kasa sentong nung badminton asayar P. V Sindhu nem Padma Bhushan award agütsüba noksa nung angur.

BILEM DANGANG

"Tenügang agütsüba aser ajungshiba agi nisung ka ajungkettsü."